

摘藻堂四庫全書薈要

集部

欽定四庫全書薈要

聖祖仁皇帝御製文第四集卷九目錄

勅諭

諭貴州巡撫劉蔭樞

諭大學士馬齊松柱蕭永藻王拱學士蔡升元王
之樞渣克旦彭始搏星俄特顧悅履薩哈布常
鵬等

諭戶部

諭兵部

諭大學士馬齊等

諭大學士九卿

諭內閣九卿

諭吏部

諭大學士九卿科道

諭議政大臣等

欽定四庫全書會要卷一萬三千一百四十七

集部

聖祖仁皇帝御製文第四集卷九

勅諭

諭貴州巡撫劉蔭樞

軍機事務關係重大一言可以鼓勵士氣一事可以退縮人心國家大事無有似此緊要者本朝自

太祖高皇帝

太宗文皇帝

世祖章皇帝迄今百有餘年所向成功事事上應天心以正討逆巡撫劉蔭樞乃讀書之人年已八十非無知少年可比初以朕為中主有不能忍怒之語及至軍前無可奏對又稱邊地雪深三四尺糧何以運駝馬何食於此愈知其無能矣外藩蒙古共有百餘部落甲兵數十萬人無糧餉馬無草乾自古以來及本朝百餘年如此極寒之地何以各安生業耶觀其一經雪後驚惶失措忘其身為巡撫秉節鉞以轄文武如敵稍強勢必致

以曹申吉羅森方光琛之徒為師也朕三統大兵曾當
嚴寒盛暑久行沙漠不毛乏水之地於軍機事務以至
喂養駝馬之方無不熟悉然後知古人論兵不得其道
多無成功每至敗事深為歎息朕中路統兵至上都波
羅河屯於三月十六等日遇雨雪風霰自京師運米出
口馬匹肥者倒斃反多而滿洲兵丁馬匹不甚傷損蒙
古馬匹如常於此可知軍前馬匹當看喂養之能與不
能古人乘春以圖蒙古者之為失策也朕近訓兵校獵

至烏里雅蘇泰八月十六日嶺巔雪深尺許至行營中
只有七寸駐蹕二日至十九日雪便全消此地去京師
七百里即已如此劉蔭樞如見黑龍江東海北海等處
之雪江中冰結八尺必奏請毀城郭棄地方盡行移徙
矣古人云雪盈尺表瑞過尺成災劉蔭樞今稱巴爾庫
爾地方雪深三四尺係伊親見抑或係何人告語並未
聲明仍交劉蔭樞往看三四尺之雪果屬親見着據實
直奏倘復聽信他人妄誕之語驚恐無措冒昧奏陳亦

着據實直奏康熙五十五年九月二十一日

諭大學士馬齊松柱蕭永藻王掞學士蔡升元王
之樞渣克旦彭始搏星俄特顧悅履薩哈布常
昂等

張伯行條奏社倉之前李光地為巡撫時曾奏請立
社倉開水田嚴保甲禁小錢朕諭此等事言之甚易行
之甚難爾且試行幾年再看其後試行終無成效民亦
受累設立社倉遇年歲豐收止可行一年耳不便久行

也倉糧庫帑設官專理尚且虧空此所收穀石交與百姓收貯寺廟公所虧空又何待言耶其間有果否可行之處爾等會同九卿商酌詳議并詢問張伯行具奏康熙五十五年十月初一日

諭戶部

朕統一寰宇無分中外皆欲久安長治共樂昇平宵旰孜孜五十餘年未嘗頃刻去懷也策妄阿喇布坦前曾頻行請安遣使來往近忽狂悖侵擾哈密哈密係我編

置佐領之部落與內地無異若不遣發師旅置之不問
斷乎不可故特徵兵備邊一切飛芻輓粟悉支正供毫
無累及閭閻然而行軍置驛及諸凡輓運皆由邊境今
歲山西陝西二省雖屬豐收喜登大有獨念邊民効力
轉輸無悞急公固其常分而民勞亦所堪恤若非格外
施恩何以昭示鼓勵茲特大沛膏澤加意培養着將沿
邊一帶運糧地方自山西大同府屬前衛右衛大同懷
仁馬邑朔州保德等七州縣衛直至陝西延安府屬府

谷神木安塞綏德米脂安定吳堡保安榆林保寧常樂
雙山魚河歸德嚮水波羅懷遠威武清平甘肅屬山丹
高臺古浪莊浪西寧肅鎮寧夏左屯中屯平羅中衛靈
寧平涼固原鎮戎西安慶陽阜城甜水河州蘭州洮州
等四十二州縣衛所堡康熙五十六年額徵銀八萬六
千一百兩零糧米豆穀三十一萬七千七百二十五石
零草二百七十六萬五千九百束零通行蠲免並將從
前積年逋欠銀糧草豆亦悉與蠲除諭旨到日該督撫

即遍行張示使遐邇僻壤莫不周知仍嚴飭所司實心奉行以副朕加厚邊民至意其或陽奉陰違澤不下究該督撫題叅從重治罪爾部即遵諭行特諭康熙五十五年十月初七日

諭兵部

朕惟國家綏靖邊圉剪除賊寇必須士馬飽騰行間奮勇乃克立奏膚功則恤兵之道宜亟講也朕御極五十餘年無時不以愛養士卒為念內而八旗禁旅外而各

省綠旗視同一體或代還私債或遣官犒賞或嚴禁尅減或察覈虛冒所以體恤之者惟恐不至近策妄阿喇布坦狂逞跳梁侵我哈密故特徵兵預備既已轉輸糗糧又復頒給馬駝籌畫倍周加惠尤渥而山西陝西綠旗兵丁曾奉調遣裹糧遠涉資用維艱每預借公帑例應扣餉抵還而始終從軍兵丁披堅執銳戮力戎行又責以還帑償補之事朕心深為憫惻是必特沛格外恩膏乃足鼓勵士氣除回汛兵丁所借銀兩外其始終從

軍之綠旗兵丁所借帑金四萬八千八百二十兩有零
咸與蠲免凱旋後弗復扣抵再嚴飭統轄將領實心奉
行倘有仍行私扣者該督撫據實指叅從重治罪以仰
副朕軫恤邊兵至意爾部即遵諭行特諭康熙五十五
年十月初七日

諭大學士馬齊等

朕令大臣皆奏密摺最有關係此即明目達聰之意也
前古帝王行之者少朕臨御五十餘年凡臣下奏摺細

加體察殊有裨益設若浙江巡撫摺奏秋成八分其福
建從浙江過者詢之或云十分或六七分一有參差便
可知其虛實矣摺奏之或公或私朕無不洞悉如果屬
有益即當酌量施行倘有徇私報復害人者即時發出
令衆知之彼之真情有不畢露者乎凡一切奏摺皆朕
親批人不能知內中亦不存稿如張鵬翮為總河時其
所奏摺有一非朕親批者乎既許摺奏諸王都統大臣
等不能測摺中所言何事自然凡事皆戒謹恐懼在今

日開言路之法莫善於此凡為小臣時大都願開言路
及為大臣則又不願而不知摺之公私朕一見自悉不
能掩也爾等可傳諭九卿特諭康熙五十五年十月初
八日

諭大學士九卿

設立社倉止一年可行若年久便不能行朕甚留意此
事李光地為巡撫時曾試行之因難行至今尚未具奏
張伯行謂知府謝賜履稱永平府屬州縣從前俱有社

倉今年春間乏食將倉糧借出民甚賴之既然如此永平府所屬地方民人緣何流往盛京幸將軍撫恤乃得給與口糧養贍耳今年直督趙宏燮具題常平倉米石及庄頭等糧米俱已用完請借銀買米賑濟朕發通倉米二十萬石遣大臣官員分路賑濟今張伯行及知府謝賜履既稱設立社倉於民大有裨益着交與張伯行謝賜履二人於永平府屬地方舉行五年如果有益再於各處舉行爾等會同九卿詢問張伯行議奏康熙五

十五年十月初八日

諭內閣九卿

人命案件關係重大不可少有疎忽朕御極以來凡奏
讞刑獄及秋審朝審等事必極其慎重細察情罪反覆
披閱俱可成誦如此詳勘毫無疑竇方分別輕重批發
施行閱今年朝審情真人犯無多止有七十餘名迨三
次覆奏後勾決時正法者不過二三十名朕勞心政治
從前微有怔忡久已全愈今年於口外水土好處調養

朕躬較往年頗覺康健並無他恙近日舊疾又微覺發動若朝審事件復加詳閱稍屬煩勞除緩決人犯細加分別將年久者多從減等發落外其朝審情真人犯朕意今年處決仍著停止康熙五十五年十月十二日

諭吏部

劉蔭樞前奉旨親赴軍前並未周閱營盤即稱患病不候旨下回至甘州且云入冬後雪深數尺恐懼奏陳今令伊親閱彼處積雪情形據實直奏又不遵旨往閱仍

托病求回原籍若伊意欲乞休久當疏奏乃未奉旨之前顧戀官職不請休致及至軍前少經寒雪即舉動失措違旨退縮奏請回籍理應從重治罪但伊年老聞訛傳之虛言遂輕信妄奏且自起用以來居官頗優操守亦清文武官員稱其寬平兵民亦多感戴伊奏摺情辭甚屬可憫諭旨到時即著回貴州辦事從寬免其議處康熙五十五年十月十六日

諭大學士九卿科道

天下事未有不由小而之大小者且不可忽大者益宜
留心爾等在衙門或能辦理事務或以清白自持亦止
在一身耳其關係封疆大事思深慮遠往往不及講究
即如海防乃今日之要務朕時加訪問即下至水手亦
常詳詢故具知曲折外間雖督撫提鎮亦或未能周知
也朕南巡過蘇州時見船廠每年造船出海貿易多至
千餘回來者不過十之五六其餘悉賣在海外齎銀而
歸朝廷造海船數十隻便須數萬金民間造船何如此

之多聞得海船桅木龍骨等皆中國所產海外無此大
木所以商人射利偷賣即加查訊彼但捏稱遭風打壞
此最叢弊作何禁絕海外如呂宋噶囉吧等口岨多聚
漢人自明代以來有之此即海賊之根也官兵出哨或
遇賊船四五隻官兵船止一二隻勢不能敵舵工又不
肯奮力向前將領亦無可如何不過尾追趕逐而已何
能剿滅耶又張伯行奏江浙間米俱出海販賣朕聞此
語亦未盡信然不可不為預防出海貿易海路或七八

更遠亦不過二十更所帶之米使足敷口食而止不應太多海中東洋可使貿易若南洋商船不可令往第當如紅毛等聽其自來耳若出南洋必從海壇經過此處截住不放豈能飛渡乎又沿海礮臺足資防守明代即有之應令各地方設立往年差往福建運米廣東所催民船有三四百隻每隻約用三四十人通計即數千人聚集海上當為久長之策即臺灣之人時與呂宋等相通亦皆須預為措置凡福建廣東及江南浙江等沿海

地方有人在京師者爾等可加細詢又如策妄阿喇布坦其初甚微老臣皆請翦除不則後且生變朕以地遠姑留之又其部下大半皆朕賞賜今渠衆稍集輒行跳梁如劉蔭樞一見提塘輩小抄便驚懼乃爾恐四方訛言流傳如福建廣東邊海地方奸徒倘或生心是宜防患於未然也朕令浙閩總督及兩廣總督來京陛見亦欲以此面諭之海外如西洋等國千百年後中國必受其累此可以逆推又漢人心多不齊如滿洲蒙古數十

萬人皆一心朕臨御多年每以漢人為難治以其不能一心故也國家承平日久務須安不忘危爾等其一一詳議康熙五十五年十月二十五日

諭議政大臣等

噶斯路之兵應於來年換班駐扎其冬間去換之人既住四個月應領四個月口糧着將馬養肥前去其春間去換之人既住八個月應領八個月口糧前去西寧之兵派出一千一同發往不需運糧軍實自固康熙五十

五年十一月十二日

欽定四庫全書

聖祖仁皇帝御製文第四集

卷九

十二

聖祖仁皇帝御製文第四集卷九

總校官庶吉士臣侍朝

校對官檢討臣王鍾健

謄錄貢生臣李敬敏

欽定四庫全書叢要

集部

聖祖仁皇帝御製文四集卷十二

十二

詳校官原任編修臣徐立綱



欽定四庫全書薈要

聖祖仁皇帝御製文第四集卷十目錄

勅諭

諭各路將軍

諭大學士九卿

諭戶部

諭學士星俄特常烏郎中三寶吳碩色鄂啟卿齊

布員外郎吳黑達賴



諭戶部

諭大學士學士九卿詹事科道等

諭吏部

諭大學士九卿

諭大學士馬齊理藩院尚書赫壽等

諭九卿

諭大學士馬齊松柱蕭永藻王掞等

欽定四庫全書會要卷一萬三千一百四十八

集部

聖祖仁皇帝御製文第四集卷十

勅諭

諭各路將軍

策妄阿喇布坦甚是奸詐之人知我兵在巴爾庫爾阿爾泰處看守嚴密周詳伊算計從噶斯大張聲勢前來掃除青海欲取西邊亦未可料着西安將軍總督額倫特郎中常壽率領西安滿漢大兵並西寧之兵在西寧

預備并率領四川松潘大兵準備若策妄阿喇布坦從
噶斯路來欲掃青海以取西邊着將西寧所備大兵與
青海之左翼台吉等一同行事提督康泰率領四川大
兵與右翼台吉等一同行事至布龍格爾地方既俱通
噶斯巴爾庫爾路徑着尚書富寧安將就近大兵酌量
派出發往布龍格爾預備抗靄地方領兵之祁里德並
巴爾庫爾之將軍雅木布等着在哨塘處小心嚴謹看
守再派精細人遠遠眺望追踪前去若策妄阿喇布坦

潛來即行領兵征剿康熙五十五年十一月十三日

諭大學士九卿

蘇州船廠每年造船多至千餘出洋貿易回來者不過
十之五六其餘皆賣在海外齎銀而歸海船桅木龍骨
皆中國所產海外無此大木故商人射利偷賣若行查
訊彼但捏稱遭風打壞而已海外如呂宋噶囉吧等口
岸多聚集漢人此即海賊之根也如張伯行啓奏江浙
間米俱出海口去賣等語貿易人等米糧酌量足敷口

食不應攜帶太多海中東洋可使貿易南洋商船不可令往如紅毛等國之船惟聽其自來耳若出南洋必從南澳海壇鎮經過此處如截住不放豈能即過耶又沿海礮臺足資防守明代即已有之應令各地方設立往年差往福建運米廣東所僱民船三四百隻合計便數千人此數千人聚集海上須為長久之策即臺灣人時與呂宋等處相通皆須預為措置凡福建廣東及江南浙江等沿海地方有人在京師者爾等可加詳詢今國

家承平日久須要安不忘危也康熙五十五年十一月二十一日

諭戶部

朕御極以來念切民生時勤宵旰凡巡歷所至必以編氓疾苦備悉諮詢蓋欲比戶之蓋藏恒裕三時之水旱無虞斯民氣和樂聿成豐亨豫大之休也頃者朕巡行口外經過三河等州縣暨永平府交界地方見今歲秋成豐稔米價稱平惟是去年雨水過溢田畝間被淹沒

朕深加軫恤蠲賦平糶轉漕分賑貧民使不致失所今者雖復有秋然僅足支一歲之用恐來年之輸將尚多難繼是必再沛恩膏始可大培民力着將順天永平兩府所屬大興宛平通州三河密雲薊州遵化順義懷柔昌平寶坻平谷豐潤玉田良鄉涿州武清永清香河霸州大城文安固安東安房山保定延慶梁城盧龍遷安樂亭灤州撫寧昌黎山海等州縣衛所康熙五十六年地丁銀二十六萬四千三百三十六兩零米豆高糧二

萬一千六百四十六石零草九萬四千九百五十束零
俱通行蠲免所有歷年積欠銀九萬三百九十六兩零
米豆高糧一萬六千二百七十五石零草八萬四千四
百七十束零亦并與豁除爾部行文該督嚴飭所屬實
心奉行俾遐村窮谷均霑德意倘有不肖有司借端朦
混私行征收者察出定行從重治罪爾部即遵諭行特
諭康熙五十五年十二月二十六日

諭學士星俄特常烏郎中三寶吳碩色鄂啓卿齊

布員外郎吳黑達賴

爾等俱出過江南海差海船一年造多少應令報明監督於出洋時將從前報過造船人名與船隻字號逐一查對方不致隱匿船數一明於錢糧及地方均有裨益第如此查驗商船或致稀少然船少於貿易亦更有利也凡大船指稱貿易領票出洋每另泊一處用小船於各處偷買米石載入大船不知運往何所乍浦地方有堤一應貨物必於此遞運其餘各口皆小大船不能出

入惟上海崇明等口甚屬緊要現今九卿為防海事宜
會議爾等將此諭傳示九卿康熙五十六年正月初十
日

諭戶部

陳瓚奏稱將巡撫衙門公用銀兩撥充餉銀曾諭以督
撫等將此項銀兩充餉具奏者朕俱批知道了並未准
其撥充緣此項係伊等應用之銀並非正項錢糧若撥
充餉嗣後不肖之徒必將此項銀兩充餉為正項此外

又行侵蝕索取諭旨甚明且此項銀兩滿保亦曾在朕前陳奏凡係動用正項錢糧例應奏銷此並非正項陳璘將伊等所用銀兩數目瑣屑具題殊屬不合其嚴飭之康熙五十六年三月十一日

諭大學士學士九卿詹事科道等

記注官陳璋於今年三月內查閱檔案抄朕去年十二月所諭江南錢糧之旨與趙熊詔伊等皆屬有心特以朕於去年曾諭江南舊欠錢糧應行蠲免今年未行蠲

免意欲將朕前後互異之處指出書寫耳去年赫壽請
頒特恩蠲免前項錢糧摺奏朕批令繕本具題及繕本
具題後朕知赫壽受人囑托又彼此私同商定具題欺
朕且以西邊正值軍需之時故舊欠未准蠲免照依部
議分年帶徵朕御極以來蠲免天下錢糧數千萬兩豈
有惜此些微舊欠之理江南官員衆多赫壽惟欲沽取
善譽於官而民殊不感戴聲名甚劣朕於事無不經歷
人亦焉能欺朕朕豈肯以大權授人乎若不將此故曉

諭諸臣爾等必謂朕前後諭旨不符所係非輕且漢人
著作文集內有將未題之稿云欲行具奏以事已完結
未獲具奏等語似此並未入告者尚且書寫況其他乎
起居注衙門記注諭旨原為敬慎起見然自古未有久
遠設立者亦有旋立旋止者皆由所記不實故耳記注
官所記諭旨朕從不檢閱交與大學士等校省大學士
等事務繁多亦無暇細校又或以師生同年瞻顧情面
恐致讐怨即有錯謬之處亦不指出殊不知記注諭旨

雖一字皆有關係朕聽政之日記注官入侍伊等跼蹐無措豈能備記諭旨詳悉紀載耶侍班漢官歸寓後將朕諭旨纂寫數日方携至署與滿官校看又每爭競是非由此觀之將朕諭旨多遺漏舛訛可知惟朕硃書諭旨及批本發科之旨始為真確耳其起居注所記難於憑信也再或有大臣所辦之事功則歸己過則諉之年老糊塗為人臣者在官一日當盡一日之心安可以年老糊塗推諉耶今國家大臣俱係年高髮白之人朕亦

年高與爾諸臣相等孟子云責難於君謂之恭陳善閉邪謂之敬吾君不能謂之賊書云一日二日萬幾天工人其代之今爾等以年老糊塗推諉教朕朕果若爾等亦以為年老糊塗或致料理失宜諸臣其能堪此乎康熙五十六年三月十六日

諭吏部

趙申喬從前奏稱鉛觔壞爛今又云鉛觔壞爛之處原非確有實見諉稱年老衰邁所致鉛觔之不壞天下通

知趙申喬自幼讀書身登進士歷陞尚書今年逾七旬
無書不覽鉛觔壞爛之處見於何書趙申喬於所辦之
事功則歸己過則諉之年老衰邁為人臣者在官一日
當盡一日之心若盡諉之衰老可以糊塗了事國家事
務作何處置耶且於緊要事情並不留心稽核錢糧出
入漫無覺察惟於一二兩之細務膠執己見刻意苛求
以鉛觔壞爛等語率意瀆奏殊屬不合該部察議具奏
康熙五十六年三月二十七日

諭大學士九卿

倉內米石甚多着分運直隸各府州縣存貯預備於民
甚有裨益每府或貯萬石每州縣或貯數千石附近通
州河道者交與倉場總督等運送其餘府州縣所運米石
速行文直隸總督派地方官乘未雨之先輓運值此青
黃不接之時於各府州縣平糶亦大有益於百姓其江
南浙江如有應行截留漕糧將截留若干之處爾等一
併速議具奏康熙五十六年四月十一日

諭大學士馬齊理藩院尚書赫壽等

本朝從各處捕獵帶來皮抄並販賣皮抄等物甚多如今市上所有因出賣不完還被蟲傷鄂羅斯如何勒令我貿易人等置買本朝最大不似爾等鄂羅斯國視為罕物無處可賣亦無官買之處今若照伊所請賒給彼時若不得銀爾等又向部院監督嘵嘵即使貿易人等賒去亦必將物販賣始能償還似此有不致曠日遲久者乎且此處皮抄之物既多自後必隔數年再來貿易

方有置買之人若不時頻來此貿易人等之貨物尚且不能賣完豈能買爾等之物耶爾等乘此時在邊境地方貿易甚善應即定奪方是將此情由告之并行文噶噶林處俾令知道伊有何言問明議奏康熙五十六年四月十二日

諭九卿

倉廩陳米甚多若年久不發徒致浥爛着於八旗三季放米之時除應領正數外將此四百三十餘萬石之陳

米酌量格外賞給官兵兩年間可以全完如此不但陳米可清倉廩得空而官兵亦有裨益矣爾等會議具奏康熙五十六年四月十六日

諭大學士馬齊松柱蕭永藻王掞等

今日覽刑部所奏遵旨審問孟光祖口供摺內有架鷹牽犬往各省去的侍衛太監等語由此觀之各省肆行詐騙之人甚多若論放鷹應在口外豈有差往南省之理前差李秉中等畫輿圖俱給有憑據又行文督撫令

其知悉况徐元夢見在前曾賞賜書籍俱有憑據朕差遣官員如此嚴密而于來鳳一案刑部尚且疑為朕所差遣之人審理時兩相瞻顧此皆督撫猶豫不奏餽送盤纏但圖苟且令其出境故至如此之極光天化日之下容此魑魅魍魎任意橫行如果王子阿哥差人賞賜外省大臣官員衣服等物理應將差人留住叩稟王子阿哥等如果採買物件亦應將差去之人留住一面將情由聲明各該管王等併將所賞物件呈送則真偽立

辨矣不應令差人遊蕩各省以壞各該管王之聲名且如朕凡有恩賜即將送去之人所賞之人俱登記檔案公來喜向太監鄒海要求取御用紅京米鄒海因不能得在街市採買誑哄來喜送去此事發覺已將鄒海正法朕稽察之嚴如此見今拏獲孟光祖在各省指稱阿哥名色誑騙行走殊屬可惡雖凌遲處死不足以蔽其辜將審出之處理宜行文各省通行曉諭巡撫年羹堯曾餽送過贏匹銀兩佟國勦亦餽送過銀兩緞疋將此

等俱隱匿未奏着明白回奏此逃人在各處誑騙數年並無一人奏聞若趙宏燮不奏朕尚不得洞悉此事若不發覺外省漢人即認作實事編書註記誣枉之事尚有甚於此者耶爾等會同九卿議奏康熙五十六年四月十九日

聖祖仁皇帝御製文第四集卷十

欽定四庫全書奮要

聖祖仁皇帝御製文第四集卷十一目錄

勅諭

諭大學士馬齊兵部侍郎查弼納學士渣克旦勒

什布

諭將軍傅爾丹等

諭大學士

諭大學士馬齊等

諭吏部

諭議政大臣等

諭諾爾布色楞布達禮等

諭議政大臣

諭大學士馬齊等

諭大學士馬齊等

諭戶部

諭戶部

諭大學士馬齊松柱李光地王揆等

諭大學士馬齊等

欽定四庫全書薈要卷一萬三千一百四十九

集部

聖祖仁皇帝御製文第四集卷十一

勅諭

諭大學士馬齊兵部侍郎查弼納學士渣克旦勒

什布

外省總督巡撫提督總兵官俱有繕摺請安之例伊等
請安摺子朕俱硃筆批發其在外大臣於朕所差人員
前請安理所應當今聞得凡由京出外及各省引見官

員前亦俱請朕安甚屬不合伊等既欲請安即可繕摺具奏乃以督撫提鎮大臣在微員前跪請朕安殊屬非體且雖行請安伊等亦不能轉達奏聞嗣後在此等來往人員之前奏請朕安者永行停止康熙五十六年四月二十二日

諭將軍傅爾丹等

吳良海與禽獸等耳有無總無關係現今大處掃滅之事乃屬緊要若大處不理止將吳良海收取遷移以為

緊要一經舉動之日向何地驅逐耶策妄阿喇布坦若
一搖動吳良海自俱為我有凡謀大事之人應將小處
暫置現今羅卜藏達席之信亦尚未來也康熙五十六
年五月二十日

諭大學士

今年春夏亢旱茲值大雨時行之候或連綿陰雨亦未
可定應傳諭八旗軍民人等將顛危房屋墻垣修理滲
漏之處早行苫蓋并潮濕朽壞物件移放高處凡事豫

則易備朕係年老之人凡經歷之處心思所到即行傳諭即不連綿陰雨平常豫備亦好也康熙五十六年六月初三日

諭大學士馬齊等

劉順卿將伊胞兄當時打死刑部照例擬斬立決甚是但念有誤殺之語故朕憐憫着九卿會議將此監候秋後處決亦屬法外施恩豈可竟議寬免九卿總視事非干已不甚留心草率議免殊屬不合着將本發回再議

具奏康熙五十六年六月初九日

諭吏部

據趙申喬奏一念愚誠誓不欺君父但精力既衰救過不逮皇上始終矜全等語如不欺君汝子趙鳳詔居官甚屬貪婪侵欺數十萬銀兩汝何不陳奏為人臣者居官一日當盡一日之心屢以衰老推諉糊塗辦事其如國家之事何凡事不平心靜氣以求合宜有意固執迨至勢不能行則云我衰老救過不逮將以此為錯悞乎

抑知而不改也若如此行事為君者安能終始矜全耶
趙申喬於謝恩摺內將此等不應奏之語具奏殊屬不
合其嚴飭之康熙五十六年七月十八日

諭議政大臣等

三路襲擊軍兵俱遵朕指示成功整旅而還其將軍蒙
古王貝勒貝子公台吉等及武職大臣官員以下軍兵
以上俱到極邊之處回來凡地方遠近道路平險水草
多少以至敵人情形動靜之狀大略俱已悉知着將現

在彼處光景逐一寫明奏聞再令將軍兵作何料理令將軍蒙古王貝勒貝子公台吉等及武職大臣官員以下軍兵以上各抒己見寫明具奏并行文將軍富寧安傅爾丹等三路軍兵俱已回來或敵人侵犯哨汛偷竊搶奪事未可定我軍應作何嚴加防範議政大臣詳議以聞康熙五十六年八月十五日

諭諾爾布色楞布達禮等

爾等俱在青海走過業已識熟所以派爾等前去如今

喇藏若能敗策妄阿喇布坦之兵信到即調回爾等倘
喇藏被策妄阿喇布坦所敗爾等即與青海台吉等一
體同心協力征討明白曉諭務當合而為一使伊等絕
無猜疑不致生變乃好或喇藏與策妄阿喇布坦之兵
會合欲征代青和碩齊須告知青海衆台吉等云策妄
阿喇布坦與我大軍為敵今喇藏策妄阿喇布坦合一
是與我顯為仇敵聖主始終仁愛保護顧什汗之子孫
直至於今一則是聖主之恩二則是爾等祖父所立之

教此時正當發憤報効與我併力而行甚易易也今四
川西寧等處邊界之兵有十萬現在又調荊州滿兵一
萬在成都預備太原等處滿兵又調在西寧準備我兵
真不可勝用將此情亦明白諭知代青和碩齊策妄阿
喇布坦之兵先征喇藏既畢方去圖謀達賴喇嘛必如
此告知再將軍額倫特曾在軍營走過漢仗既好才具
亦優凡事要爾等一體同心若有所聞見處務必公同
商酌而行康熙五十六年九月初一日

諭議政大臣

此次兵丁雖未臨陣克取地方然官兵協意同心効力甚屬可嘉此二十五萬六千零四十三兩銀兩將朕內庫發出令之整理馬匹器械第路遠不能即達附近何處地方所有錢糧着戶部速行料理成功時此項銀兩不必扣除俸祿錢糧俱作朕之賞賜若未有行走之處空回各本汛者如議政所議仍行扣除現將內庫銀兩照此數交與戶部速行解往陝西此項錢糧係朕特恩

其另造檔案務令核實清楚特諭康熙五十六年九月初六日

諭大學士馬齊等

從前曾諭九卿各省官員內有居官不好聲名不堪者隨聞隨即繕摺具奏今李錫居官甚劣何以竟無一人奏朕各省官員賢否九卿豈無所聞凡大臣啓奏苟所聞不確於奏摺內即云臣所聞如此不甚詳確一併聲明未嘗不可朕亦止欲知之耳並非不加訪實即行治

罪也況奏摺又不發出隨聞隨奏各省官員亦知懲戒
悛改近閱九卿保舉以為好官而薦引者有之以為劣
員而糾叅者何並無一人着諭九卿康熙五十六年九
月二十日

諭大學士馬齊等

河南盜賊蔓延如此總兵馮君洗一次未嘗奏聞巡撫
張聖佐雖經具奏並不將實情聲明又不嚴加查緝是
以朕諭令山西總兵金國正巡撫蘇克濟查奏乃知張

聖佐等不能查緝此盜因遣尚書張廷樞學士勒什布等前往查拿今已全獲覽其供狀與金國正蘇克濟等所奏相符此案鄰省各官俱已確聞而九卿豈竟無所聞耶九卿內有豫省人何亦無一人奏聞也從前屢諭一應事務應隨聞隨奏似此關係地方要事自應有聞即奏或所奏未切不妨奏云臣所聞如此所知未確一併陳明至巡撫年羹堯所賞差往松潘兵丁銀兩米石牛羊茶葉康泰等領去並未全給兵丁致各兵鼓噪而

回此皆康泰平素並不訓練并不撫恤之故也各省督撫提臣悉係封疆大吏總兵官等有管轄一省兵丁防守地方之責關係甚重凡補總兵時朕惟視其騎射嫻熟人材壯健曾有效力之處即行除授此內有居官不好不留心地方並不黽勉供職者九卿官員應隨聞隨奏今觀九卿保舉人員惟圖利己冀其酬報即行薦舉者甚多似此有關地方要務以及大吏賢否雖有聞知竟置若罔聞並不具奏爾等會同九卿議奏康熙五十

六年十月十九日

諭戶部

朕統馭寰區撫綏萬國無分中外凡率土兵民之生計未嘗一日不為之勤求也自剿滅三藩以後為八旗甲兵詳加籌畫曾頒發帑金數百萬兩代清積逋又資其匱絀復賞數百萬兩凡隨圍出征雖給行在錢糧官駝馬匹猶恐用度不繼設立八旗官庫以濟官兵四十五年復施恩將官庫未經扣完銀三百九十五萬六千六

百餘兩盡與除免嗣後官庫事務漸至擾亂故停止八旗之庫設立公庫自此以來官兵有益庫內案件亦甚清楚但每月扣取錢糧朕深為厯念曾有無耻積惡撥什庫侵欺兵餉朕故交與戶部將兩月錢糧一次支放俱令給與本人近聞領取銀兩兵丁甫出部門即被人持去公庫既行扣除又復償還私債兵丁所剩甚少以此養贍室家奉行差務斷然不足朕每懷及此深切軫惻茲特大沛恩施式弘撫育停止公庫將現今未經扣

完銀一百九十一萬八千兩有奇通行豁免自五十七年正月為始着給與兵丁全分銀兩爾部即傳諭八旗都統等出示通曉俾咸知朕優恤禁旅至意康熙五十六年十一月二十四日

諭戶部

朕撫馭寰宇五十餘年夜寐夙興為小民勤求生遂凡率土遠近皆期共享樂利聿成家給人足之休未嘗一日不厯諸懷也數十年以來各省正賦屢經全免歷年

積欠亦已蠲徵偶有雨澤愆期或發倉廩散給或截漕糧賑救不惜數萬萬金錢米穀頻沛恩施誠念窮簷之艱慮其至於顛連失所耳近者民力雖已稍紓然念分年帶徵銀兩若不格外優寬則小民一歲所獲分納二年之賦以其贏餘養贍室家斷難充足朕每懷及此軫惻良深宜更加殊恩通行豁免今將直隸安徽江蘇浙江江西湖廣西安甘肅等八處帶徵地丁屯衛銀二百三十九萬八千三百八十兩有奇概免徵收其漕項雖

例不准免亦着破格施恩將安徽江蘇所屬帶徵漕項
銀四十九萬五千一百九十餘兩米麥豆一十四萬六
千六百一十餘石內免徵各半爾部即行文該督撫嚴
飭所屬實心奉行徧加曉諭俾民間無徵催之累均霑
實惠用稱朕撫卹羣黎至意倘有不肖有司借端朦混
私行徵收者該督撫嚴察叅處如該督撫失察一併從
重處分爾部即遵諭行康熙五十六年十一月二十五
日

諭大學士馬齊松柱李光地王掞等

歷觀古來帝王建立起居注亦間有廢置者朕在位日久設立多年近見記注官內多年少微員皆非諳練事務之人伊等且不知措置此身又何能全記朕之諭旨耶且官職卑小或有事關大臣者囑托伊等即任意粉飾裝點朕之諭旨反多遺漏不行備錄且抄寫旨意與人視為常事記注之事關係甚鉅一言失實足啓後世之疑即如趙熊詔曾私抄諭旨攜出朕若設建立起居注

一二年而即廢或謂朕懼伊等記載是非亦未可知朕
立起居注甚為久遠在位五十七年矣非從前在位日
淺之主可比其是非何待伊等記注此衙門全無裨益
作何裁革之處爾等會同九卿議奏康熙五十七年三
月初三日

諭大學士馬齊等

發往黑龍江伊蘭哈喇三姓地方之人俱因兇惡發遣
人亦日多若發在一處地方必致生事行兇此後傳其

發往著發喀爾喀和卜圖烏蘭古木地方彼處水土甚
好著築城安插令其開墾耕種八旗每佐領派護軍披
甲各一名於八月內馬匹肥壯時前去二年一換駐劄
彼處看守如此則沿途臺站甚屬緊要每站應設立車
輜預備毋致犯人勞苦方好著交與京城議政大臣會
同九卿議奏康熙五十七年七月十五日

欽定四庫全書薈要

聖祖仁皇帝御製文第四集卷十二目錄

勅諭

諭大學士馬齊等

諭大學士馬齊

諭戶部

諭吏部尚書張鵬翮侍郎李旭升傅紳湯右曾

諭內大臣巴渾岱等

諭吏部尚書張鵬翮侍郎李旭升傅紳湯右曾

諭議政大臣內大臣等

諭大學士馬齊松柱蕭永藻王掞王頊齡學士勒
什布常壽穆爾泰阿克敦德音額赫納張廷玉

蔣廷錫

諭大學士九卿大臣科道

諭大學士馬齊松柱蕭永藻王掞王頊齡等

諭大學士馬齊等

諭大學士九卿等

欽定四庫全書薈要卷一萬三千一百五十

集部

聖祖仁皇帝御製文第四集卷十二

勅諭

諭大學士馬齊等

河南總兵官高成標下兵丁因查拏賭錢人等至知府署內爭鬧將知府沈淵帶至教場看守三日巡撫業已奏聞御史楊汝穀一聞即行題叅甚是聞此等之人俱非食糧兵丁謊稱營兵夥同二三百人詐擾平民不獨

河南一省他省俱有之其行文各省督撫提鎮伊等地
方有無不食糧謊稱營兵合夥妄行不法之人查明據
實奏聞如此嚴行稽察此等謊稱之匪類自不能歸入
兵丁之內其作何嚴查令督撫提鎮保奏並作何禁約
治罪之處交九卿議奏康熙五十七年七月二十七日

諭大學士馬齊

聞今年安徽所屬地方出蛟發水甚是傷民前日曹頌
家人來奏晴雨錄問說是實總督巡撫雖未曾啓奏朕

既聞知心切軫恤京中有安徽地方官員着交與九卿
速行問明回奏康熙五十七年八月二十四日

諭戶部

朕臨御五十七年凡師行轉餉及災祲偶見即厯懷殷
切蠲免賑濟之恩靡不下逮蓋治安天下惟期民生得
所而欲民生得所必以敷恩寬賦為急也三年以來因
策妄阿喇布坦狂逞跳梁遣發大兵屯駐西邊一切軍
興征繕皆動支正供錢糧不使累及閭閻而轉輸輓運

陝西百姓雖勉力急公勞苦實堪憫恤又莊浪等處地震隨經特遣部院堂官星馳前往察賑而用兵之後宜格外加恩用綏黎庶應將陝西巡撫甘肅巡撫所屬通省各府州縣衛所錢糧米豆草束俱行蠲免目今係有軍務之時除米豆草束外其康熙五十八年應徵地丁銀一百八十八萬三千五百三十六兩有奇併歷年積欠銀四萬七百五十七兩有奇着一槩蠲免爾部速行文該督撫通行曉諭實心奉行務俾均霑德意以副朕

篤念民勞拯恤災傷至意如有不肖官吏朦混私徵澤
不下究者該督撫嚴察指叅從重治罪爾部即遵諭行
特諭康熙五十七年閏八月二十三日

諭吏部尚書張鵬翮侍郎李旭升傅紳湯右曾

考試月官令做八股時文大都抄錄舊文苟且塞責而
已嗣後不必作八股時文止令寫履歷以三百字為限
觀其字之妍醜文之工拙則人之優劣自可立見矣康
熙五十七年十月初十日

諭內大臣巴渾岱等

四川巡撫年羹堯自軍興以來一切辦事熟練明敏又能度量西去進剿之兵會同青海公丹仲之人運食物米糧接濟殊屬可嘉竭力急公而漢仗亦好從前四川地方亦有總督年羹堯係巡撫止理民事無督兵責任現今軍機緊要將年羹堯授為四川省總督如明年大兵前進則由松潘一路進發而在成都之二千滿洲兵甚少將荊州之滿洲兵再派一千令在成都預備駐劄

此滿洲兵俱令都統法拉管轄所派一千兵之空缺挑選餘丁一千名令其披甲充補着議政大臣速議具奏康熙五十七年十月二十日

諭吏部尚書張鵬翮侍郎李旭升傅紳湯右曾

部院衙門滿洲官員及在侍衛班行走漢官每遇奏事派六員引見科員及御史無論巡城與不巡城奏事日令滿洲三員漢人三員侍班翰林亦派出五員侍班此侍班人員內如有不得來者其數不必補足即聽其缺

少如此伊等可得認識矣康熙五十七年十月二十日

諭議政大臣內大臣等

每旗都統副都統或有起家微賤專意徇庇一應補放
官員併佐領等事恒有遲至數年或十年不奏者或一
官病故已久數年尚仍給俸者一切事件漫不稽查甚
是曠廢近聞都統石文英不出門戶亦不見人有事來
奏每不俟事畢祇圖早歸亦不瞻仰朕容甚屬不堪正
藍旗滿洲都統顏信前往出兵其滿洲蒙古漢軍三旗

之事着七阿哥辦理正黃旗都統巴賽署理將軍事務
其滿洲蒙古漢軍三旗之事着十阿哥辦理正白旗滿
洲都統何禮差往雲南其滿洲蒙古漢軍三旗之事着
十二阿哥辦理如此辦理別旗各相效法自必發憤勤
事也康熙五十七年十月三十日

諭大學士馬齊松柱蕭永藻王掇王頊齡學士勒
什布常壽穆爾泰阿克敦德音額赫納張廷玉
蔣廷錫

陳瓚居官甚優操守廉潔清官朕亦見之如伊者朕實未見恐古人中亦不多得也前在臺灣道任內其所應得銀三萬兩並未入己俱於修理砲臺等公事動用署總督印務時應得銀兩亦未分毫沾染前來京陛見時曾奏稱貪官不在取之多寡取一錢即與取百千萬金等必一文不取乃可謂之清廉人所以貪取錢財者皆因艱於用度臣曾任縣令看來一行作吏即可不至窮苦即不取一文衣食亦能充足等語今觀其居官實能

踐所奏之言誠清廉中之卓絕者似此不加表揚賜卹
朕殊不忍着追授禮部尚書凡祭葬立碑與謚之處皆
照尚書銜給與并蔭一子入監讀書以示朕優禮清廉
大臣之意康熙五十七年十一月初十日

諭大學士九卿大臣科道

朕從前屢諭諸臣及科道官員各省有應行奏聞事件
隨聞隨即繕摺具奏者非令其糾叅不過欲知之早耳
朕即聞之亦不肯聲明或未詳確亦不肯治罪也即如

去年河南兇犯亢珽等擾害地方妄行不法朕他有所聞即特頒諭旨差遣大臣拿獲審結今歲聞江南地方起蛟即傳諭詢問陝西地震即差大臣散賑彼處人民咸謂皇上注念小民加意軫恤少有災眚有聞即便施恩不令失所近日湖廣所屬兩州縣地方有奸宄之徒捏造妖言煽惑愚民放火劫掠曾經總督滿丕奏聞朕即諭令審結此皆因朕聞知方遣人傳旨如無所聞何由降旨料理耶且各省地方兵丁空糧甚多五十二年

大賞天下兵丁時曾諭散賞諸臣逐一按名散給其遣往諸臣因不認識兵丁不能稽查頂冒以致所有空糧數目未能清楚不獨遠隔京師地方之兵丁即直隸近處空糧亦不勝數養兵丁特為備用而設平時將空乏之兵不行補足不行訓練臨時欲用縱有募補之兵累萬亦何濟乎即如漢文臣遇敵明義理者亦不過捐軀報國而已此事朕甚慮之前歲朕以往赴呂宋噶囉吧之人甚多恐其生事曾諭查明作何設法召回內地

自從議奏之後聞於來船附回者頗衆此係外洋於內地毫無關涉而朕留心訪詢者並無他故不過欲知地方情形人數多寡以便防備耳朕料理諸務皆藉爾等諸臣如不將爾等信任混行詢問微末之人斷然不可蓋詢及微末人等必至紛擾生事也且各省文官私派加耗武官空糧等事朕頻得聞知則人皆知畏懼可以悛改於事大有裨益此等有關地方事務及官員賢否諸臣何嘗不知即鄰省大吏亦未嘗不知或係師生親

友或係同年或因子弟親戚在伊省居官故爾彼此掣肘不肯具奏彼此相隱不以上聞何以防微杜漸殊不知朕聞之苟未詳確必不即行治罪也亦防患於未萌之意耳嗣後衆九卿大臣科道官員凡有關地方事務及官員賢否有聞即繕摺具奏若所聞未確不妨即以所聞未確之處一併聲明爾等會同九卿議奏康熙五十七年十一月二十四日

諭大學士馬齊松柱蕭永藻王掞王頊齡等

各省監禁緩決及秋後處決人犯甚多已經緩決斷不至死遲至年久仍然得釋若久行監禁不但患病死亡且使獄中人犯亦漸增多爾等會同九卿將直隸各省緩決及秋後處決人犯情罪作何分別完結之處詳加確議具奏再被毆受傷至保辜限外身死部內奏明緣由兩行請旨者無庸議外有當時不曾殞命逾數日或因傷風或因他病而死仍將毆打之人議抵情有可矜此等並未有定例亦會同九卿確議定例具奏康熙五

十七年十一月二十四日

諭大學馬齊等

叅將員缺部內將小銜叅將大銜遊擊開列具奏此定例不可更變但叅將補授叅將該提督總兵官等每每奏請畱任故雖補授亦不能赴任甚屬無用嗣後叅將員缺着將就近地方應陞小銜叅將大銜遊擊并應陞官員等察明職銜大小及補授叅遊或越銜不越銜越銜者越幾等之處詳細開列具奏如此朕亦易於揀選

補授矣凡題武職官員俱照此甚善爾等可明白交部
康熙五十七年十二月初四日

諭大學士九卿等

今歲元旦日食日食雖係一定而交限可以推算且被
陰雲微雪未曾得見但別省無雲之處必有見者況日
值三始人事不可不謹現今封印諸臣無事時事或有
闕失之處應商酌確議朕意謂陰氣似覺稍盛京師地
方從來每多地震已經隔有年歲今歲至春秋時或稍

地震亦未可定也康熙五十八年正月初六日

聖祖仁皇帝御製文第四集卷十二

總校官庶吉士臣侍朝

校對官檢討臣王鍾健

謄錄貢生臣李敬敏

欽定四庫全書薈要

集部

聖祖仁皇帝御製文四集卷十五

三五

詳校官原任編修臣徐立綱

欽定四庫全書薈要

聖祖仁皇帝御製文第四集卷十三目錄

勅諭

諭大學士九卿等

諭大學士九卿等

諭大學士馬齊等

諭大學士九卿詹事科道

諭戶部



諭議政大臣九卿等

諭大學士馬齊等

諭大學士馬齊等

諭學士常壽

諭議政大臣

諭大學士馬齊松柱蕭永藻王掇王頊齡學士張
廷玉蔣廷錫高其倬勵廷儀阿克敦額赫納格
爾布等

諭戶部

欽定四庫全書薈要卷一萬三千一百五十一集部

聖祖仁皇帝御製文第四集卷十三

勅諭

諭大學士九卿等

京城通州倉內貯米甚多各省漕糧起運亦無缺悞與
其在此倉內堆積以致耗散杭州蘇州鎮江江寧淮安
安慶等處俱有倉廩與水路相近江南浙江漕船想此
時已過朕意欲將湖南江西等未過漕糧截留存貯此

等地方倉內遇米價涌貴之年將此存貯米石或減價糶賣或行散賑則民人得沾實惠大有裨益如地丁錢糧雖經蠲免不過於田多富戶有益其無地窮民有何益處則米穀甚屬緊要不可不預為備也年來雖遇豐收米糧價賤但歲歲豐收豈能期必乎應將久遠裨益之處預行籌畫着內閣九卿將漕糧作何截留之處會同議奏康熙五十八年正月二十九日

諭大學士九卿等

各省虧空錢糧甚多總督楊琳因查出歷年積欠錢糧將伊應得銀兩照數補完鹽課事務俱已清楚并將督撫趙宏燦滿丕等從前所得銀兩行文伊等解送甘肅以為軍需之用此銀兩解到甘肅作何項錢糧使用令繕本題明由此觀之各省虧空錢糧督撫等果能盡心竭力補完則虧空可以完結其作何將虧空錢糧完結之處內閣九卿等會同詳確議奏康熙五十八年正月二十九日

諭大學士馬齊等

戶部現今採買器皿舊銅茲工部又行採買京城焉有
如許舊器皿銅觔乎採買至不得之時不肖之徒乘機
射利必致將制錢轉買銷燬燬錢則錢價必長甚於生
民無益且伊等局內每月鑄錢即將伊匠役工錢作為
採買銅觔所鑄之錢交部亦未可定此事不無情弊着
問九卿并趙申喬徐元夢具奏康熙五十八年三月十
九日

諭大學士九卿詹事科道

朕臨御以來一切機務事必躬親從不敢稍自暇逸但少壯時精力有餘不覺其勞今氣血漸衰精神漸減辦事殊覺疲憊寫字手亦漸顫仍欲如當年事事精詳則力有不能若草率辦理又此心所未安從來書生論歷代帝王多指摘過失謂其安享富貴耽於逸樂朕披閱史書歷觀古來帝王因深知為君之難即朕六十年宵肝勤勞雖金石為質亦應消耗況氣血之身乎又如詩

文一事皆出朕心裁從無假手於人內書房翰林輩不過令其校對謄寫耳現今在位大臣年老者大約與朕年相彷彿衙門辦事不過一二時辰即可歸寓安息有疾亦可告假且有托病偷安者同列與司屬豈能強之入署乎如舊年考試武進士趙申喬在朕前睡去侍衛屢次喚醒朕前尚且如此在衙門辦事時可知矣今天下大小事務皆朕一身親理無可旁貸若將要務分任於人則斷斷不可所以無問鉅細朕必躬自裁斷早夜焦

勞而心血因之日耗也但年力雖衰而志意始終如一

仍未敢稍懈自朝至於日昃坐卧起居曾無片晷餘閒
勉強支持心勞力竭爾諸臣曾無一人為朕黽勉抒誠
者或恐有不肖之徒見朕精神氣血漸不如前因以為奸
亦未可定此諸臣俱應留心者也朕前冬曾有諭旨爾
諸臣未必記憶理應不時省閱今部中之事錯誤亦有
如恩詔援赦刑部逐件具題殊非舊例部院衙門如此
類頗多朕不欲悉心詳閱得乎又如總督鄂海題請蠲

免甘肅米石草束章奏甚長朕字字細覽所擬票籤錯
誤朕曾改正批出總之諸臣徒事虛文見朕躬煩勞不
過云皇上理宜靜養似此皆如畫餅有何實濟耶又凡
有論說諸臣不過敷陳頌聖套語如勵精圖治健行不
怠聖不自聖安愈求安之類若與不讀書者言之甚覺
可聽朕讀書明理凡事皆身體力行此等粉飾浮詞六
十年中盈溢於耳久已厭聞爾等務須實心任事盡去
虛文方有裨益也康熙五十八年四月初九日

諭戶部

朕幸熱河一路麥苗盈野收成頗佳但麥熟之歲徃徃雨水早而且多朕留心稼穡歷年最久所見如此爾部即速傳直隸河南山左山右口外地方速將已收之麥晾乾入屯收貯以免潮濕壞爛則今年所收足用二年矣康熙五十八年五月初六日

諭議政大臣九卿等

九卿議在京城開捐一案斷不可准行此次以軍需在

甘肅大同等處開捐運兵糧及捐駝之事例迄今尚未
清楚亦甚繁雜今若再開此例終無完日矣從前二十
一年開捐延至四十七年未能清楚且張鵬翮具奏將
捐納人員停其選用朕曾諭於錢糧有益已經准行之
事安可停其選用令衆人失望耶因不准所奏今戶部
庫內貯銀有幾千萬兩此番軍需事務儘可支用何必
議開捐納夫捐納事例不但於政事無益且頭緒繁多
亦難辦理捐收米石則地方米價騰踴捐收馬駝則馬

駝價值驟貴開捐於外省又須將執照轉行送部開捐
於京城大臣等誰無親戚不無彼此倩托掣肘其互相
營求等弊何以杜絕或再有貧人那措銀兩捐納赴任
安能得為好官耶聞運糧捐駝人員亦有交駝一二隻
而包攬之人將米以官駝馱運本身並未親去即將伊
捐駝運米叙用者捐納事例種種弊端朕深知之斷不
可准行也且軍前辦理糧餉大臣等將所用錢糧從鄰
近省分解送該督撫布政司俱多為預備其給運送夫

役并收領大臣等項所費愈多近日朕遣官催騾送銀
十萬兩與大將軍王處並無費用甚屬簡便嗣後將戶
部庫銀計彼足用尚差解送則軍前料理糧餉大人等
知之亦必不敢妄行多用矣如此不但運送簡便而於
事亦有裨益如果至應開捐時再行開捐亦未為遲悞
也康熙五十八年六月十五日

諭大學士馬齊等

據巡撫李樹德奏山東闔省雨暘時若二麥十分豐收

代達小民貢獻新麥製麵此端一開各省必致互相效
法貢獻各色物件不惟事體煩瑣抑或不肖有司借端
多派苦累民間這所進麥麪着發還康熙五十八年七
月十四日

諭大學士馬齊等

每年口外禾苗發往京中看視因將高大穗多者攜去
並非以之誇耀冀諸臣懼忤頌揚也今歲永定河水漫
越隄坼田禾被淹安徽所屬地方霖雨起蛟田廬俱沒

浙江五月陽早聞湖南湖北江西則早稻豐登河南山
左禾苗甚佳其收穫分數尚未確聞著傳諭九卿康熙
五十八年七月二十二日

諭學士常壽

朕覽邵子聲音圖於各國聲音有不能該括處朕於聲
音之學究心二十餘年朕雖未親至鄉里而鄉里人之
聲音無不悉知即如清字之音有漢字所無者漢字之
音亦有清字所未備者朕將此聲音圖討論多日欲該

括各國聲音斷乎不能朕以為性理精義內邵子聲音
圖宜仍漢字其清字圖可以不用蒙養齋修書舉人王
蘭生諳曉音韻之學爾與之商酌看他意見如何並將
此旨令漢大臣同閱康熙五十八年十月十三日

諭議政大臣

爾等皆係議政大臣凡議政諸事並不留心俱草率議
覆聞自備効力捐駝運米人員並未親身前往將官駝
所運米石以為本身運到竟邀議叙自備種地人員並

未種地交糧而管理種地之人希圖利益向彼需索即報稱交糧入倉亦得邀議叙現今倉內米石已致缺乏所以侍郎敦拜等奏明歲運米請作速運到米糧以補倉內缺乏也爾議政大臣於諸事不甚留心草率議覆之處朕屢有諭旨爾等須加意恪遵康熙五十八年十月二十七日

諭大學士馬齊松柱蕭永藻王掇王頊齡學士張廷玉蔣廷錫高其倬勵廷儀阿克敦額赫納格

爾布等

敬

天尊

祖所關至重至大朕自御極以來凡

壇廟祭祀朕俱親詣行禮年來因多病足痛不能親往
每遣大臣恭代孔子云吾不與祭如不祭朕自不能親
詣五內甚切思慕欲得瞻仰

郊壇而非祭祀之日則典儀未備又非盡誠盡敬之理

今朕躬少好如南苑湯泉乘肩輿俱可行走今冬至齋戒之時朕足雖不得力潔誠之念有餘擬於祭日朕躬親詣照常禮節於祭祀之前升

壇瞻仰省視俎豆若可跪拜朕拜後退處更衣幄次俟恭代親王行禮畢然後回鑾朕心始安已將此旨諭諸皇子大臣會同議奏此係創禮如漢大臣以從無此典引據書史為言朕年已老憊在位六十年矣豈易得此例乎目今朕身安好可以前往倘此數日內朕躬少覺

不能親往即可停止已派有親王恭代矣特諭康熙五十八年十一月初七日

諭戶部

朕惟治天下之要首以乂安民生為急故自御極以來於閭閻疾苦無不博諮廣詢渙敷庥澤其有動用民力之處尤孜孜厯念刻不能忘蓋六十年如一日也比年來因策妄阿喇布坦狂逞跳梁興兵征討遠歷邊陲其沿邊數處師旅屯駐一切雖皆支用正項錢糧而協辦

轉輸行齎居送之事民力勞瘁朕心時切軫念曾將陝西甘肅巡撫所屬康熙五十八年額徵地丁銀一百八十八萬兩零歷年舊欠銀四萬兩零特沛恩綸悉行蠲免而沿邊各州縣衛所軍行既多飛輓之勞辦賦復滋催科之擾若非格外加恩黎民恐致失業所有沿邊一帶陝西延安府屬府谷神木安塞綏德米脂安定吳堡保安榆林保寧常樂雙山魚河歸德嚮水波羅懷遠威武清平葭州龍州鎮靖鎮羅寧塞靖邊柳樹澗安邊磚

井定邊饒陽水堡高家堡甘肅屬山丹高臺古浪莊浪
西寧肅鎮寧夏左屯中屯平羅中衛靈州寧州平涼衛
固原州鎮戎西安阜城甜水河州歸德蘭州洮州寧夏
前衛平涼縣固原衛固原廳河州衛蘭州衛蘭州廳慶
陽涼州衛永昌衛鎮番衛甘州左衛甘州右衛肅州衛
鎮彝所等六十八州縣衛所堡康熙五十九年錢糧米
豆草束俱宜蠲免但目今係有軍務之時除米豆草束
外將康熙五十九年額征銀九萬八千一百兩零盡行

蠲免爾部移文該督撫通行曉諭實心奉行務俾均沾
德惠以副朕曲軫邊民之至意倘或借端征派澤不下
究該督撫嚴察指叅從重治罪爾部即遵諭行特諭康
熙五十八年十二月二十三日

聖祖仁皇帝御製文第四集卷十三

欽定四庫全書薈要

聖祖仁皇帝御製文第四集卷十四目錄

勅諭

諭領侍衛內大臣議政大臣軍前調回大臣八旗
都統前鋒統領護軍統領副都統等

諭和碩顯親王衍璜等

諭大學士馬齊等

諭大學士馬齊等

諭大學士馬齊等

諭靖逆將軍富寧安等

諭大學士馬齊等

諭大學士馬齊尚書孫渣齊徐元夢等

諭吏部

諭吏部

欽定四庫全書薈要卷一萬三千一百五十二

集部

聖祖仁皇帝御製文第四集卷十四

勅諭

諭領侍衛內大臣議政大臣軍前調回大臣八旗
都統前鋒統領護軍統領副都統等

太祖

太宗時滿洲兵於凡征戰之所俱自備馬匹口糧行走
到處所向立功並無遲悞今官兵凡有行走之處馬匹

糧餉一切物件俱給自官帑且以為不足而怨咨生焉
此皆我滿洲風習較之曩昔有異亦由於該管官並不
嚴飭之故也朕辦理軍務閱歷甚多當日攻取岳州時
但從陸路抵禦以致許久不得朕諭在洞庭湖預備船
隻以水路遏賊貝勒查尼以湖中風浪甚大船不能穩
恐有碍於兵丁以請撤船兵奏聞朕諭岳州城已被困
不久即獲今將船兵撤退賊得由水道往來何能有得
岳州之期哉若兵丁於水道不利即與朕之殺害無異

朕自承任不撤船兵嚴飭看守不久而岳州下矣再征討雲南時貝子張泰將軍賴塔率領滿洲兵每佐領下撥二十七名總督哈詹蔡毓榮董繼國金先祖提督桑格趙徠等標下營兵合計共三四十萬有餘離雲南城七十里安營一邊到湖一邊到山並未進兵於湖斷其水路賊寇米糧照舊運行城內並不危急後趙良棟率領寧夏兵到云我等連營四布不就近往戰何日得城迨至日久米糧不到雖滿兵無妨營兵何以存立耶張

泰云兵丁俱從遠來且城亦朝夕可獲皇上恤養兵丁
何可令其傷損設或營兵不能禦敵我等勢必捐軀趙
良棟云貝子果領兵進戰奪城此功可邀封親王郡王
何故作此等議論乎我領本標營兵徑自前往遂進戰
奪取得勝橋而趙良棟之兵亦瘁甚矣張泰向趙良棟
云爾兵已瘁何不將爾之兵撤回令總督蔡毓榮率兵
看守趙良棟云我將死戰所得之地如何交與他人看
守不聽張泰之言城內賊寇始覺危急不數日而雲南

下矣亦由善於計謀相機而動也再出征烏蘭布通時
阿密達因天晚要撤兵云皇上必不以撤兵故遂殺我
等將兵撤退索額圖明珠選勇士六七百人埋伏勇士
云挑選我輩原擬或戰或追詎意止令看守彼此不無
忿怨後中路出兵時三品以上大臣官員等會議進兵
之處衆皆謂不可獨朕與費揚古以兵為可進遂決意
進兵及至科拖地方衆皆不欲前發大臣等勸朕將兵
撤回已渾岱爾亦在其中朕諭以祭告

天地

太廟

社稷親統兵前來並不見賊踪如何驟行撤兵不允所
請將兵前進噶爾旦聞我兵威甚是驚懼如鼠竄而去
朕選兵着馬斯喀為將軍尾追噶爾旦遇西路兵攻擊
大敗之朕將中路于成龍所運頭隊米遣明珠速送至
費揚古軍前二隊米亦即着續送三隊米內朕但留十
八天口糧餘米俱送西路軍前是以西路兵丁未至饑

饑俱得保全而回朕是時若輕信大臣等言中道撤兵則兩路兵丁何得立功奏凱耶今看領兵大臣官員等祇為一身之計不視朕事為緊要内存私意彼此爭論不和又向兵丁沽買好名多取口糧及不能馱載至於拋棄毫無珍惜之意如此可乎不可乎朕之滿洲兵俱係精兵無可議論全在領兵者將朕之事專心辦理不求安逸賞罰精明事體如何得致錯悞進兵西藏時色楞不候衆人獨自前往不知者妄行議論額倫特因病

在後隨後追至色楞皆奮不顧身如此猶可謂色楞進之過速乎今策妄諾爾布將伊兵丁善全而歸伊所領之兵甚感亦惟感伊而已朕頗不憐憫也朕祇憐憫進西路身亡兵丁事定之後自然分別加恩至文武大臣官員等果能清廉自無可議但領兵大臣專務清廉將何所挾持以勸賞兵丁乎部院衙門清廉者止能自守其身辦如此大事恐不能也朕年少時每於講武練兵等事違命者即置之於法內外大小悉知儆惕由此觀

之訓練之事不可踈忽也茲衆喀爾喀誠服朕之風化
青海等亦如之策妄阿喇布坦之人霸占藏地毀其寺
廟散其番僧累其臣僚青海等理應棄命忘身奮勇致
討乃伊等口稱維持黃教却無實心効力之人策零敦
多布領兵在藏居住彼處人以地遠我兵不能深入策
零敦多布從伊地步行一年有餘忍饑帶餒而至招所
以彼之兵衆以彼之形狀尚且能至我軍顧不能至乎
今滿漢大臣咸謂不必進兵朕意此時不進兵安藏賊

寇漸至收服番子等將作何處置耶故特諭爾等安藏
大兵決宜前進康熙五十九年正月初五日

諭和碩顯親王衍璜等

朕碌碌在位五十九年朕亦不知此皆

上蒼眷佑

先聖造福於朕何涉且西陲現在用兵軍民殊屬勞苦
去歲正月朔日食方今七月朔又值日食海洋颶風飄
沒官兵船隻山左東三府黎民饑饉流離屢次起蛟城

池及民間廬舍戶口被淹淮黃水大僅能搶護民人風俗未治官員政事未端此正君臣殷殷求治之時至於區區慶賀行禮甚非朕意朕御極雖在順治十八年間現今時歷係康熙五十九年此亦不可不審康熙五十九年正月十二日

諭大學士馬齊等

總督年羹堯自軍興以來効力辦理甚優漢仗亦好其四川之兵預備練習甚是整齊止就伊等威勢可以成

功速行文總督年羹堯令伊帶領四川滿漢兵馬進剿
如有能署理總督事務地方不致生事者令總督年羹
堯奏聞署理年羹堯即授為將軍帶領雲南四川兵馬
前進如不得署理之人四川地方緊要著授護軍統領
噶爾弼為將軍帶領雲南四川兩處兵馬前進其將軍
印勅若不速行造送恐致不及凡各處領兵大人非授
為將軍難以彈壓人眾祁里德此次前來看其人亦去
得可管轄眾蒙古台吉亦應授為將軍給與印勅進剿

西藏之招地其領大兵之將軍印勅應速造送往所給
印勅交大學士等具奏康熙五十九年二月十六日

諭大學士馬齊等

前日覽戶部尚書趙申喬辭疏朕深憐之念其操守清
廉始終一轍性雖暴躁而為人朴直年近八旬病勢料
難全愈倘一時不保亦未可定趙申喬乃革職留任之
官照陳詵之例復還原職當賠之銀一概寬免內閣將
此旨速行發去令病人早知一日或五內少得安寧便

於調攝頤養也康熙五十九年四月二十二日

諭大學士馬齊等

總兵官金國正所奏陝西兩年收成歉薄百姓有流離之狀陝西地方關係甚要文武官員內賢能者俱已發往軍前此處應着實留心着交與九卿詳加議奏聞得四川兵丁照常操練其別省並不操練陝西綠旗兵數較他省甚多出兵去者無幾其現存兵丁豈可不操練器械豈可不修整着嚴飭督撫提鎮實心奉行至總督

鄂海從前居官亦優今因年老聲名甚不如前此兩年
歉收之處並未奏聞將此亦諭九卿康熙五十九年五
月十五日

諭靖逆將軍富寧安等

看今歲稍旱即速行文與四路軍中大人等如兵馬營
中亢旱馬尚未肥或進兵之路甚旱水草不敷既經軍
中之大人等議定進兵復何敢以亢旱不能進兵為辭
擅自停止軍務所關甚大朕從前屢次曾諭過議政大

臣並領兵之大臣等凡軍機之事今日如此定議明日又改俱未可定要在相其機變而行因此朕必熟思而後特頒旨意苟無旨意恐軍中之大臣難於奉行也若現今旱甚惟期早到所指之處及至彼處因亢旱而無水草馬匹倒斃則兵馬如何前進如何回旋而明年如何進兵耶總之軍中雨水及時牧草果好行兵自無艱阻應即行進兵設或亢旱馬匹疲瘦雨水不調牧草不堪則即以不宜進兵之處令軍中之大臣等定議具奏

斷不可將今歲若不宜進兵來年亦可再進作游移之語呈奏也路途遙遠恐發去文書不到遲延遺失亦未可定須明日發一次續後再行文一次其已爾庫爾與阿爾泰兩路乃係一起若一處不可則將一處停止西路雲南四川之兵伊等乃各自分起也康熙五十九年五月十五日

諭大學士馬齊等

朕聞保安懷來等處地震宜速遣大臣前往賑濟若俟

部中啟奏便致遲延着派副都御史楊柱屠沂令伊等
作速自京城出居庸關前往延慶州保安懷來沙城等
處查閱一面奏聞施恩并採取蔚州廣昌渾源州等處
信息如被災果重着一併施恩派直隸守道李維鈞酌
量帶地方官幾員自彼處前往其派包衣官一員將內
庫銀帶三萬兩之處朕於阿哥處另下諭旨康熙五十
九年六月二十一日

諭大學士馬齊尚書孫渣齊徐元夢等

楊宗義所奏此事不至開捐朕先巡幸陝西曾問河南
由黃河水路通至陝西之處地方官以不能行走回奏
上古大禹鑿龍門通濬水道漢唐之時俱經輓運豈有
不能行船之理朕特遣三阿哥往勘三阿哥乘騎渡黃
河至砥柱龍門看過竟可行船且私鹽船隻亦多從此
往來由龍門至黃河直抵渭河至西安北門從絳州汾
河可至山西太原彼時曾有交與西安將軍總督巡撫
山西河南巡撫會看具題之本楊宗義不知此等緣由

因有此奏着將將軍總督巡撫等會題原案查奏至總
漕施世綸居官素優歷年漕船俱經催僨全完並無遲
悞本年漕船已經過畢此間並無事務漕運印務交與
總河趙世顯署理施世綸速赴豫省從河南府由黃河
至西安輓運路徑勘明具奏陝西現存穀石數目亦查
明具奏今陝西正值軍需之際施世綸暫居陝西令協
助鄂海辦理糧餉事務康熙五十九年七月初十日

諭吏部

今正值軍務之時如有需員之處目前即得官發往事
方有濟如照陳瓚條奏大臣等雖易於辦理而發往官
員之貧富何由得知似此屢次變更軍務反致遲悞今
值軍興正人臣効力之時陳瓚着以御史銜發往大將
軍王處令其効力行走伊至彼地何以有益於軍務及
速得人員辦理之處既知之後再行條奏康熙五十九
年九月十二日

諭吏部

知府蔣兆龍部議降二級調用西邊正值軍務之時地方不肖官員規避以圖脫離彼處多有從輕議處回籍又復捐納希得美缺者此輩不可不懲蔣兆龍着革職不許捐納自後此等從輕議處官員俱照此例革職亦勿得令其捐納康熙五十九年九月十二日

聖祖仁皇帝御製文第四集卷十四